



Gaa-dakoosing Ozhibii'igan

February 2025

Marten Falls Anishinaabeg Dazhiikewin Aabadak Miikana (Dazhiikewin Aabadak Miikana) o-daa-debinaanaawaa ji-bagidinindwaa ji-maajii-miikanaakewaad ogimaawining akiikaaning gaye Gaanada Akiing. Bezhig ge-andooshkang Gaanada Aki ji-nanaando-gikenjigaadeg aaniin ge-inishkaagemagak ozhichigaadeg iwe miikana, ji-ayaawaad ini mazina'iganan. Ji-debinigaadeg owe mazina'igan gaa-wiindamaagemagak, ngii-ozhitoomin wiindamaagewin wegonen ge-ayaamagak imaa:

- ◆ Gaa-dakoosing Ozhibii'igan
- ◆ Ogimaakaan odoozhibii'igan
- ◆ Gaa-dakoosingin ozhibii'iganan (ge-dazhinigaadeg gegoon gaye ge-gikenjigaadeg): gaye
- ◆ Godak wiindamaagewin

ES 1. Nindibaajimowininaan

Niinawind Marten Falls gaa-onjiiyaang Anishinaabeg ndayaamin imaa gaa-izhijiwangin Albany Ziibi gaye Ogoki Ziibi giwedonong Ontario. Animikii-wiikwedong iwe gichi-oodena, Ontario ngojigo 430 daso-diba'akaan zhaawanong inake.

Aapiji weweni ndoondaadizimin omaa akiing, mewinzha omaa edanakiiyaang egikendamaang ezhiyaag. Anishinaabe bimaadiziwin nin-dizhinikaadaamin owe – Anishinaabe bimaadiziwin – mii imaa wenji-gikendamaang aaniin ge-izhi-bimaadiziyaang omaa akiing gaye godak gaa-bimaadiziwaad omaa. Gii-anishinaabewiyaang, nimbimizha'aamin - mino-bimaadiziwin – weweni ji-ayaa'aang – Gizhe-manidoo aaniish nin-gii-miinigonaan owe, weweni ji-wiiji'ayaamangwaa godak awiyag.

Odaanaang gaa-gii-bi-ayaawaad weweni gii-izhi-bimaadiziwaag gabe-biboon, gabe-niibin gii-andawenjigewaad, gii-giigooyikewaad gii-mawinzowaad. Gii-dagoshinowaad dash wemitigoozhiwaag, gii-aanjise bimaadiziwin. Niibiwa awensiwa o-gii-nisaawaa gaye inaakonigewin daabishkoo Indian Act ningii-gibitinigoomin weweni ji-izhi-bimaadiziyaang. Gikino'amaadiwigamigong gii-izhiwinaawag ninijaaanisinaanig e-gii-maanzhidoodawindwaa, giyaabi noongom e-onji-gagwaadagendamowaad.

Bagwadakamig ayaamagan ndazhiikewininaan, ezanagak bimaadiziwin. Gaa-bimisemagak eta daa-aabadan ji-izhaang Marten Falls Animikii-wiikwedong gaye Nakina ji-onji-maajaang. Bibooni-miikana ozhichigaade endaso biboon, gaawiin dash bizhishig onizhishinzinoon iwe ozaam bakaan gii-ani-izhiwebak. Zanagan dash ji-biijigaadeg miijim gaye godak gegoonan, gaye gaawiin aapiji zhooniyaakesiiwag awiyag. Gaawiin gaye minosesinoon ji-mawadisindwaa gaa-inawemangwaa, gaawiin gaye aapiji miijim, nibi gaa-minikwaadeg gaye waasiganig-bimide gaye gaa-aabadakin gii-ozhichigaadeg gegoon, gaye mino-ayaawin.

Mii dash endawendamaang ji-ozhichigaadeg miikana ge-aabadak gabe-gikinoonowin, gaawiin eta gii-niibing, Ontario gichi-miikanaang ji-inamok iwe miikana. Giishpin iwe izhiseg, nin-ga-debinaamin gakina gegoon ge-aabajitoowaang. Nin-ga-gashkitoomin ji-dibenindizoyaang babenak ji-izhi-bimaadiziyaang. Iwe Dazhiikewin Miikana da-onji-minose niibiwa gegoon. Ninandawendaamin ji-gashkitoowaang ji-bami'idizowang daabishkoo gaa-izhi-mino-biamadiziwaad Anishinaabeg Dazhiikewining.

ES 2. Aaniin Wenji-andawendamaang Owe Miikanahy

Iwe Dazhiikewin Miikana ayaamagak nin-ga-gashkitoomin gichi-miikana Ontario ji-izhaayaang. Bizaanigo da-mawadisidiwag Anishinaabeg nawach babenak ji-ayaag bimi-ayaawin. Nawach da-nisaginde miijim waasigani-bimide gaye godak gegoonan gaye nawach da-minose mino-ayaawin gikino'amaagoowin gaye mino-bimaadiziwin. Wiinge da-onizhishin bimaadiziwin giishpin debinamaang iwe miikana.

Owe miikana ge-aabadak gabe-gikinoonowin niibiwa da-inaabadan gaye da-onji-zhooniyaakewag Anishinaabeg dazhiikewining gaa-ayaawaad gaye godak. Iwe Dazhiikewin Miikana da-onjiimagan anokiiwin ozhichigaadeg iwe miikana gaye bamichigaadeg. Da-onji-minose Marten Falls Anishinaabeg ji-anokiiwaad aaniish naa da-anokiiwag gabe-gikinoonowin.

Aanawi Marten Falls maawach oda-aabajitoonaawaa ikwe Dazhiikewin Miikana, giyaabi dash akiikaan wii-aabajitoonaawaa ji-nanaandosiniwaad. Ozhichigaadeg iwe Dazhiikewin Miikana amii akiikaan ogimaawiwini ge-izhi-ozhitoowaad anokiiwinan, ginwesh ge-minoseg, gaye ji-mino-bimaadiziwaad awiyag waasa giwedonong.

Iwe Dazhiikewin Miikana, gaawiin gakina da-minosesinoon gaa-zanagendagwak giyaabi dash da-minose niibiwa gegoon. Oshkiya'ii gaa-minoseg da-ayaamagan omaa dazhiikewining babenag ji-ayaag bimaadiziwin niigaan akiiwang.

ES 3. Ezhichigeyaang

Niinawind Marten Falls Ishkoniganing gaa-onjiiyaang Ndagwiimin imaa Dazhiikewin Miikana. Nindanishinaabewimin imaa dazhiikewining ninandawendaamin dash ji-dagwiiyaang. Ogimaakaan gaye nishwaaso odininiima ndoodaapinigoomin endasoniizhobiboon daabishkoo gaa-izhising imaa Indian Act inaakonigewining. Ndagwiimin gaye nindoogimaakandaamin ishkoniigan, niinawind dash ndizhisemin ji-izhichigeng ji-ozhigaadeg iwe Dazhiikewin Miikana, gaye ji-bizindawindwa Anishinaabeg omaa gaa-izhi-dibendaagoziwaad. Ji-minoseg iwe dazhiikewin izhichigaaniwang. Ogimaakaan gaye odininiima odinendaanaawaa ji-ayaamagak iwe Dazhiikewin Miikana, ji-wiidookaagewaad Dazhiikewining gaa-ayaawaad gaye gitaadiziig.

Marten Falls Dazhiikewin Miikana Izhichigewin (Izhichigewin gaa-dazhiikamowaad), gii-ozhichigaade ji-maajii-ozhichigaadeg ge-biminizha'igaadeg ji-gikenjigaadeg aaniin ge-inishkaagemagak iwe ozhichigaadeg miikana, gaye ji-gagwejimindwaa Anishinaabeg aaniish mii iwe endawendaagwak ji-izhiseg. Izhichigewin gaa-dazhiikamowaad, niizhiwag ishkoniiganing gaa-onjiiwaad, bezhig gaa-niigaanishkang gaye gaa-nagajitood gegoon. Mii dash ogo ge-bizindawawaad oigimaakaan gaye odininiima gaye ishkoniiganing gaa-wiidookaagewaad gaye gakina Anishinaabeg.

Izhichigewin gaa-dazhiikamowaad gii-inaawag ji-niigaanishkamowaad iwe, ji-maamiinomaawaad gaa-wiiji'iwewaad, ji-dazhiikamowaad zhooniyaakewin, jinaakwetamowaad, ji-agindamowaad azina'iganan. Izhichigewin gaa-dazhiikamowaad gaye inaawag ji-dibaajimowaad aaniin ezhiseg iwe gaa-ozhichigaadeg miikana, gaye jii-ikidowaad giishpin gegoon andawenjigaadeg ji-dazhinjigaadeg gaye godak gegoon. Gaa-nagajitoonid gegoon oda-wiidanokiimaawaa' ji-mikamowaad aaniin ge-izhi-wiindamaagewaad gikenjigewin imaa Marten Falls.

ES 4. Aaniin Gaa-izhi-odaapinamaan Ge-inamok Miikana

2007 gii-izhiseg gii-gichi-naanaagadawenjigaade aaniindi ge-inamog iwe Dazhiikewin Miikana. 2019 dash gii-izhiseg owe gii-inenjigaade – Bezhig Inake 1 miinawaa Bezhig Inake 4. Minji-niizh Painter Lake Miikana maajii-inamood giuwedinong dash izhaamaganoon 130 km jibwaa-izhaamagakin waabanong omaa gidazhiikewinininaang, ngojigo giuwedinong imaa Albany Ziibi.

Bezhig Inake 1 gaye Bezhig Inake 4 bezhigwan inake inamonoon, ningoding aazhideshkaawaan. Gii-nisinoon gaa-inamokin ge-gii-odaapinigaadegibaniin. Owe bezhig aazhawishkaa imaa Ogoki Ziibiing, bezhig miinawaa ji-aazhawishkaag Albany Ziibiing gaye gegapii odaapinigaadeg iwe waabanong inake Marten Falls.

2019 gii-izhiseg biinish 2024, gaa-gikendaasowaad o-gii-maawadoonaanaawaa gikenjigewin ji-nisidotamowaad aan ezhiseg aki, zhooniyaakewin gaye gaa-izhi-bimaadizinaaniwang. Gii-niibing 2023, gaa-gikendaasowaad gaye godak dinookaanag gii-gagwejimaawag ji-dazhindamowaad iwe gikenjigewin gaye Anishinaabe gikendaasowin, ji-dazhindamowaad wegonen iwe 1 Inake gaye 4 Inake, ji-odaapinamowaad maawach ge-onizhishing ji-inamog miikana. Gii-waabanjigaade dash owe inendamowin gaye Dazhiikewining gaa-ayaawaad awiyag enendamowaad, ji-gikendamowaad Anishinaabeg gaye Ogimaakaan gaye Odiniiniima', gaye dazhiikewinan, godag awiyag gaye ogimaag. Gii-dazhinjigaade dash owe, e-gii-waabanda'indwaa Ogimaakaan gaye Odiniiniima' ji-waabandamowaad. Ogimaakaan inaakonigewin e-ikidoomagak e-zaagichigaadeg (Ge-inamog Miikana) gii-ozhibii'igaade August 26, 2024 gii-inangizod. Waabandan Agindaason ES 4-1 ji-waabandaman iwe Ge-inamog Miikana.

Agindaason ES 4-1 Ge-inamog Miikana

ES 5. Ge-inwaazowaad Gaa-bimiwidoowaad

Jibwaa-gashkichigaadeg ji-ozhichigaadeg iwe Dazhiikewin Miikana, nitam da-andawenjigaadewan ji-bagidiniweng ji-izhichigeng gegoonan imaa izhichigewining, daabishkoo ji-ozhichigaadeg iwe Dazhiikewin Miikana gaye ji-achigaadegin ge-danakamigak owe ji-ozhichigaadeg. Iwe Dazhiikewin Miikana, ini niizhin ogimaawinan Gaanada Aki gaye akiikaan, da-ikidowag wegonen ge-andawendaagwak jibwaa-maajitaang.

Iwe Nitam Enishkaagemagak / Inishkaagewin Ikidowin gii-ozhichigaade ji-wiindamaageng aaniin Gaanada Aki Ogimaa Endawendang Ji-izhichigeng gaye akiikaan Endawendamowaad Ji-izhisenig. Nakwetamowin omaa da-ganawaabanjigaade gaye da-dagonigaade enenjigaadeg ji-ozhichigaadeg iwe Ishkwaawaach Enishkaagemagak Mazina'igan / Inishkaagewin Ikidowin.

Igi Gaa-bimiwidoowaad oda-ganawaabandaanaawaa iwe wiindamaagewin ji-ikidowaad enendamowaad giishpin ji-ayaamagak gemaa gaawiin ji-ayaamagazinog iwe Ishkwaawaach Enishkaagemagak Mazina'igan / Inishkaagewin Ikidowin.

ES 6. Waa-izhichigeyaang

Zanagan ji-ozhichigaadeg iwe Enishkaagemagak / Inishkaagewin Ikidowin. Iwe Ishkwaawaach Enishkaagemagak / Inishkaagewin Ikidowin dazhinjigaadeg Dazhiikewin

Miikana igi niizhwewaan ogimaawinan da-ikidoomaganoon enendamowaad. Omaa ozhibii'igaade edakwaag ge-izhichigeng ji-ozhichigaadeg iwe inendamowin.

- ◆ **Anishinaabe Gikendaasowin:** 2019 gii-izhiseg iwe Izhichigewin Gaa-dazhiikamowaad o-gii-maajii-maawadoonaawaa Anishinaabe Gikendaasowin. Gii-maajii-dazhindamowaad iwe Enishkaagemagak Akiing / Inishkaagewin Ikidowin, gii-wiindamaagewag Anishinaabeg gekendamowaad iwe Anishinaabe Gikendaasowin. Gii-dagonigaade dash gaye imaa wemitigoozhii gikendaasowin. Gii-inenjigaade gaa-izhi-niizhing Anishinaabe gikendaasowin gaye wemitigoozhii gikendaasowin ji-onizhishing ji-biminizha'igaadeg, ji-gikenjigaadeg aaniin ge-izhiseg gaye aaniin ge-izhi-manaa-maanzhichigeng gaye ge-izhi-naagadawaabanjigaadeg gegoon.
- ◆ **Enishkaagowaad Ikwewag:** Gii-ganawaabanjigaade owe ji-gikenjigaadeg aaniin ezhisewaad awiyag owe onji. Daabishkoo ikwewag gaa-daawaad gegoon inendamogwenag anokiiwininiwa' besho imaa gii-ayaanid maagizhaa gaye Anishinaabe ininiwag gii-wiidanokiimaawaad wemitigoozhiwa. Ogichi-inendaanaawaa igi Marten Falls Anishinaabeg aaniish bakaan giinawind gidinenimigoomin. Gii-naanaagadawenjigaade owe bakaan inake aaniish gaawiin aapiji da-inishkaagemagazinoon apiich godak.
- ◆ **Gaa-zanagakin Izhichigewinan:** Maamaw 20 gii-dasinoon izhichigewinan gaa-ayaagin imaa Enishkaagemagak / Inishkaagewin Ikidowin daabishkoo iwe nibi ogidakamig gaa-ayaag gaye awensiwag gaye Anishinaabe bimaadiziwin. Mii owe nibi, aki gaye awiyag.
- ◆ **Gaa-gichi-inenjigaadegin:** Gii-maajii-dazhinjigaade wegonen gechi-inendamowaad Anishinaabeg, gakina awiyag, Gaanada Aki ogimaag gaye awenenag igo ge-inishkaagowaapan iwe Dazhiikewin Miikana; gichi-inenjigaadewan ini. O-gii-maawadoobii'aanaawaa ogimaakaang gaa-anokiivaad. Gii-dazhiikigaadeg dash owe, Anishinaabe Gikendaasowin gii-dagonigaade gaye egaganoonindwaa Anishinaabeg Marten Falls gaye godak ishkoniganan gaa-dibendaagoziwaad.
- ◆ **Gaa-naagwak:** Miinawaa dash ji-mikigaadeg aaniin ge-inishkaagowaad iwe Dazhiikewin Miitana igi gaa-gii-wiinindwaa ji-zaamishkaagowaad. Gaa-naagwak izhinikaade iwe. Aabajichiganan gemaa gegoon gaa-gichi-inenjigaadeg giishpin aanjiseq, maagizhaa gegoon daa-izhise nibi, aki gemaa awiyag.
- ◆ **Izhichigewin Ge-doodaming:** Nisidotamang aaniin ozhichigaadeg miikana ge-inishkaagemak imaa nibiing, akiing gaye awiyag gaa-daawaad omaa, gichi-

inenjigaade ji-gikenjigaadeg iwe. Gaawiin gakina anokiiwin izhichigewin da-ayaamagazinoon.

- ◆ **Gaa-ayaamagak imaa:** Da-wiinjigaade aaniindi gaa-dazhinjigaadeg ji-gikenjigaadeg aan ge-izhiseg.
- ◆ **Noongom eta Gaa-ayaamagak imaa:** Mii ge-onji-gikenjigaadeg aaniin ako ginwesh ge-inishkaagemagak. Iwe Dazhiikewin Miikana ozhichigaadeg, aabajichigaadeg gaye ganawenjigaadeg, mii gaa-idamowaad. Ngojigo 3 gemaa 10 daso-biboon da-ozhichigaade iwe miikana, ji-aabajichigaadeg gaye ji-ganawenjigaadeg wiin bizhishig.
- ◆ **Noongom gaa-izhinaagwak:** Aki, nibi gaye awiyag gii-maawadoonigaade gikenjigewin aan ezhisemagak imaa ge-ayaamagak iwe Dazhiikewin Miikana.
- ◆ **Ge-inishkaagemagak:** Noongom gaa-izhinaagwak, gaye ozhichigaadeg miikana, aabajichigaadeg miikana gaye ganawenjigaadeg, da-gikenjigaade aaniin ge-inishkaagemagak iwe ozhichigaadeg Dazhiikewin Miikana imaa aki, nibi gaye awiyag gaa-daawaad imaa. Gaa-ishkwaa-waabanjigaadeg ge-izhiseg, gaye aaniin ge-inishkaagemagak iwe, gaye ji-gikenjigaadeg wegonen ge-izhichigesigwaa ji-maanzhiseg gegoon. Iwe Ge-inishkaagemagak gaa-ijigaadeg ge-izhiseg ishkwaa-doodamowaad ji-maanzhisesinog gegoon. Da-waabanjigaade dash iwe Ge-inishkaagemagak wegonen wenizhishing gaye wegonen gaa-onizhishinzinog iwe Dazhiikewin Miikana gaa-izhichigemagak. Igi dash gikendaasowin gaa-dazhiikamowaad oda-ozhibii'aanaawaa aaniin ge-izhisemagak.
- ◆ **Maamawi-izhiseg:** Gii-ozhichigaade niibidebii'igan gaa-dazhindeg in noongom izhichigewinan gaye gaa-andawendamowad ji-izhichigewaad. Gii-aanjibii'igaade dash iwe mazina'igan ji-dibaajimowaad Anishinaabeg gaye godak awiyag oodenaang gaye igi gaa-bimiwijigewaad. Gii-ganawaabanjigaade dash iwe niibidebii'igan ji-waabandamowaad aaniin ge-inishkaagemagak imaa akiing, nibiing gaye awiyag gaa-daawaad imaa iwe Dazhiikewin Miikana onji. Maamawi-izhiseg mazina'igan gii-ozhise.

ES 7. Ozhichigaadeg Gi-miikanaaminaan

Iwe Dazhiikewin Miikana da-ozhichigaade gabe-gikinoonowin ji-aabadak Painter Lake Road biinish imaa Marten Falls. Ge-dibendamowaad iwe, ge-naagajitoowaad, ji-wawezhitoowaad, gaye giishpin maanzhichigemagak mii ono akiikaan gaa-dazhindang.

Iwe Dazhiikewin Miikana iwe miikana gaa-dazhinjigaadeg, gaye miikanaansan gaa-babakemokin, gaa-izhi-gibichiing, ge-wiikobijigaadeg, aazhoganan, zhiibaa-miikanaang ge-izhijiwang nibi, waanikaanan gaye asinii-waanikaanan.

Iwe Enishkaagemagak / Inishkaagewin Ikidowin gii-giizhichigaade gii-maajii-ozhibii'igaadeg aan ge-izhinaagwak iwe miikana. Mii dash wenji-giizhichigaadesinog noongom aaniish giyaabi onenjigaade aan ge-izhinaagwak iwe Dazhiikewin Miikana.

Iwe Dazhiikewin Miikana onenjigaade ge-izhinaagwak ono ebiminizha'igaadegin:

- ◆ **Niigaanendamowin** gii-maajise gii-onenjigaadeg ji-ayaamagak iwe Dazhiikewin Miikana, gii-ishkwaa-dazhinjigaadeg awashime midaaso-biboon.
- ◆ **Nitam Mamazinibii'igewin** ii-ozhichigaade nitam gaa-gii-inenjigaade iwe Dazhiikewin Miikana. Mii ge-inamog iwe miikana gaye dabashiya'ii ge-izhinaagwak miikana gaye aazhoganan.
- ◆ **Mamazinibii'igewin Ezhiseg** mii iwe gii-mamazinibii'iged awe gaa-onwaadang biinish giizhi-inendang gaye iwe nitam mazinibii'igan. Giyaabi dash oda-bii'aawaa ini gaa-dazhiikaminid ji-ikidowaad enendamowaad. Iwe mamazinibii'igan da-waabanjigaade aaniin maya age-izhinaagwak iwe mazinibi'igan gaye dinookaanan aazhoganan gaye gaa-zhiibaa-izhijiwang nibi.
- ◆ **Ozhichigewin** da-izhise ishwkaa mamazinibii'igewaad. Aaniin ge-izhi-ozhichigaadeg iwe (daabishkoo aandi inake gaye ge-izhichigewaad) da-odaapinigaade wiiba imaa apii mamazinibii'igeng.
- ◆ **Aabajichigaadeg** miikana gaye naagajichigaadeg iwe gaa-ijigaadeg ji-bimibizowaad (odaabaanag gaye gichi-odaabaanag) gaye ji-wawezhichigaadeg biigomok. Owe apii ishwkaa-giizhichigaadeg iwe miikana gaye dash apii aabadak iwe miikana.

Noongom iwe Dazhiikewin Miikana megwaa Nitam Mazinibii'igaade

ES 8. **Bimaadiziying Imaa Gidakiiminaang**

Gichi-inendaagwan iwe Nitam Enishkaagemagak / Inishkaagewin Ikidowin ji-nisidotamang aaniin ezhisemagak gakina gegoon daabishkoo aki, zhooniyaakewin gaye gaa-izhitwaaying, gaa-izhiseg igo gegoon. Gaa-naanaagadwaabanjigaadeg Enishkaag aki, biindig onzaabandaman gaye agwajiing, gii-giizhichigaadewan ono ji-gikenjigaadeg ezhisemagak gakinagegoon noongom 1 Inake gaye 4 Inake. Gii-odaapinigaade Gaa-andawenjigaadeg Ji-inamok, ini dash gikenjigaadewan nibi, aki gaye awiyag gaa-daawaad imaa. Owe dash gaa-onji-izhichigewaad:

- ◆ **Nibi:** Bimaadiziwin onjiimagan nibi, giminigoomin aki gaye gakina awensiwig gaa-ayaawaad omaa.
- ◆ **Aki:** Marten Falls Anishinaabeg ogichi-inendaanaawaa aki. Mii imaa akiing wendinamang gakina gegoon, aweneniwiying, izhitwawin gaye gaa-izhi-bimaadiziying. Akiing izhi-bimaadiziwig gakina bemaadiziwaad, mii imaa ezhi-waakaaseg gegoon. Gaa-gii-izhibaadiziying daabishkoo gii-andomoozweying imaa akiing wenjiimagak iwe. Aanawi ginandawendaamin oshkiya'iin gaa-ayaagin noongom daabishkoo zhooniyaakewin, zhaagooch dash Marten Falls Anishinaabeg ogichi-inendaanaawaa iwe bimaadiziwin. Marten Falls Anishinaabeg ogichi-inendaanaawaa gaa-izhiseg aki. Aapiji wii-gichiwinaanaawaa gete-bimaadiziwin aaniish mii imaa onizhishing aki ge-ondinaman bimaadiziwin ani-akiwang.
- ◆ **Mii:** Awiyaag Gaa-daawaad omaa: Nitaa-wanii'igewag gaye bagidawaawag gaye andawenjigewag Anishinaabeg ji-ashandizowaad gaye mii aaniish gaa-bi-inaadiziwaad odaanaang. Gaa-gii-izhi-bimaadiziwaad Marten Falls Anishinaabeg noongom gaawiin aapiji iwe izhichigesiiwig ozaam bakaan e-inendaagwa bimaadiziwin. Giiyaabi dash ominwendaanaawaa gii-andawenjigewaad onandawendaanaawaa dash gaawiin ji-wiinichigaadesinog odakiimiwaa.

Wiinge niibiwa gikenjigewin gii-maawadoonigaade gii-nanaando-gikenjigeng, gii-ozhibii'igaadewan dash ji-gikendamong aaniin gaa-izhi-waabandamowaad igi gaa-gikendaasowaad. Gaawiin omaa mazina'iganing da-ozhibii'igaadesinoon aaniish bebikish da-ozhibii'igaade iwe gikendaasowin. Ono mazina'iganan maamawibii'igaadewan imaa Gaanada Akiing Inishkaagewin Ikidowining. Owe gaye daa-debinigaade omaa: **eais.martenfallsaccessroad.ca**.

Endaso-mazina'iganens gaa-wiinjigaadeg omaa da-ikidoomagan owe:

- ◆ Nitam ikidowin;
- ◆ Gaa-izhiseg noongom;
- ◆ Ge-inishkaagemakiban gaye aan ge-onji-gibitinigaadeg;
- ◆ Ge-inishkaagemagak; gaye
- ◆ Ge-maamawi-inishkaagemagak.

Nin-gii-maamawinaamin ono ozhibii'iganan gaa-gikendaasowaad gaa-gii-ozhibii'amowaad, ji-nisidotamowaad awiyag, daabishkoo aaniindi ezhi-dago-gikenjigaadegin gaye aandi ge-izhi-maamawi-ozhibii'igaadeg iwe gikendaasowin. Owe izhibii'igaadewan ini mazina'iganan:

- ◆ Giigooyag gaye gaa-izhi-dazhiikewaad;
- ◆ Anaamiindim nibi gaye ogidakamig gaa-ayaag nibi daabishkoo ziibiin gaye zaaga'iganiin;
- ◆ Mashkiigoon;
- ◆ Azhashki gaye gitigaanan;
- ◆ Awensiwag aya'aawishag gaye bineshiinzhang;
- ◆ Aya'aawishag daabishkoo adik gaye moonz;
- ◆ Gaa-noondaagwak, ishpiming gaa-ayaag gaye gaa-baashkineyaagin ishpiming;
- ◆ Gete-iy'a'in gaa-gikendamowaad gaye gete-izhitwaawin;
- ◆ Gaa-izhi-aanji-izhiwebak;
- ◆ Mino-bimaadiziwin ishkoniiganing (zhooniyaakewin, mino-ayaawin gaye ji-maanzhisesigwaa awiyag gaye gii-okodaawaad); gaye
- ◆ Gaa-naagwak agwajing gaye aki gaye gaa-aabajichigaadeg.

ES 9. Aaniin Ge-izhi-aanjiseg gidakiminaan Miikana ateg

Daabishkoo gaa-gii-dazhinjigaadeg aazha, gii-maawadoonigaade gikendaasowin imaa 1 Inake gaye 4 Inake ji-nisidotamang aan ezhiseg noongom aki, zhooniyaakewin gaye izhitwaawin. Iwe gikendaasowin gii-aabajichigaade ji-wiji'indwaa Marten Falls Anishinaabe ji-odaapinamowaad Endawendamowaad Ji-inamog Miikana. Endaso-gikendaasowining gii-ozhibii'igaade enendamowaad. Gii-ikidom aaniin ge-inishkaagemagakiban (gaa-onizhishing, gaa-maanzhiseg, gaye nisaw) gaye dash ge-izhi-gagwe-gibitiniigaadegiban gaa-maanzhichigemagak gaye ji-gagwe-minotoowaad gaye ji-naagadawaabandamowaad ge-inishkaagemagak ishkwaawaach.

Endaso-gikendaasowin aabajichigaade wiindamaagewin gii-ikidowag aan ge-izhiseg maajii-ozhichigaadeg miikana, aabajichigaadeg iwe miikana, gaye ganawenjigaadeg. Iwe gaa-onji-doodamong ji-gikenjigaadeg aaniin ge-inishkaagemagak iwe Dazhiikewin Miikana gaye aki. Gaa-ishkwaa-gikendamowaad ge-inishkaagemagak, ogikendaanaawaa aaniin ge-izhichigeng ji-manaa-izhiseg iwe. Amii dash ge-izhichigewaad iwe ji-izhisesinog.

Daabishkoo owe, da-achigaadewan gaa-izhi-ganawenjigaadeg waasiganibimide 30 m. waasa imaa gaa-izhi-ayaagin zaaga'iganiin gaye ziibiin maagizhaa ziigiseg iwe waasigani-bimide, ji-izhijiwang imaa nibiing. Ishkwaa-waabanjigaadeg iwe da-izhichigewag gaawiin gegoon ji-maanzhiseg. Da-dazhinjigaade gakina iwe imaa mazina'iganensing ge-waawiindamaageng.

ES 10. Maamaw Ge-izhiseg

Owe da-izhi-waawiindamaagewag ge-izhisemagakiban ...

Owe inendan noopimiing e-ayaayeg giin zhigo gidnawemaaganag. Wiinge bangan imaa. Bizaan ayaamagan. Gi-maajii-gitojigem wiinge gizhiwe. Dagoshinowaad nawach gaa-ani-gitaadiziwaad, gewiinawaa owii-bizindaanaawaa gitochigewin gaa-minotamowaad. Giinawaa dash gibizindaam gaa-gizhiweg.

Iwe dash gaa-bizindameg, gigizhewetoom aaniish. Wiinge biinish gichi-initaagwan gakina e-baatiinoweg. Wiinge gichi-initaagwan gaa-biidoyeg imaa noopimiing, mii iwe gaa-idamaang Maamaw Ge-izhiseg.

Nisinoon omaa gaa-dazhinjigaadeg ji-nisidotqamang. Onoweniwan gaa-idamaang:

- ◆ **Niizhingin Gaa-izhiseg:** giishpin bezhig gegoon izhiseg gii-izhiseg gegoon, mii iwe. Daabishkoo gii-biidooyeg gitochigewin imaa noopiming, niswayag ayaamagan gaa-onjiimagak gaa-noondaagwag bezhigwan api. Giishpin dash awiya gitochiged ishkwaa-maajaayeg, ini niizhin izhichigewinan gaawiin naasaab izhisesinoon. Iwe gaa-gii-noondaagomochigeyeg gaawiin naasaab izhisesinoon noongom gaa-noondaagwak.
- ◆ **Aandi gaa-izhiseg:** Bezahig gegoon inakamigak ngoji bakaan. Giishpin awiyag bakaan dazhi-gitochigewaad, gaawiin dash noondaagozisiwag gaa-izhi-ayaayeg, gaawiin da-noondaagozisiwag. Gaawiin naasaab izhisesinoon iwe.
- ◆ **Ge-waabanjigaadegiban Izhichigewin:** Owe ishkwawaach gaa-dazhinjigaadeg gegoonan ge-izhisegibaniin ge-gikendaman ge-inishkaagemagakin. Daabishkoo giishpin noopimiing ayaayeg, awiyag dash biizhaawaad ji-moojigitoowaad, mii iwe Maamaw Inishkaagewin gaa-izhinikaadeg. Gaawiin aaniish gi-gii-gikendaziim ji-biizhaawaad ji-bi-ombiigiziwaad. Mii dash gaa-ijigaadeg giishpin ozhichigaadeg miikana, gaye dash biigoseg aazhogan, amii dash ji-wawezhichigaadeg. Gaawiin gii-gikenjigaadesinoon ji-izhiseg. Gaawiin gi-gii-gikendaziin iwe ji-izhiseg, ji-gichi-initaagwak wawezhichigaadeg iwe aazhogan.

Owe dash ji-nisidotaman ezhiseg gii-ombiigizinaaniawng noopimiing, owe gidaa:

- ◆ Nisidotan **aaniin gaa-izhiseg jibwaa-dagoshinan imaa**, aaniin gaa-initaagwak.
- ◆ Nisidotan aan **enishkaagemagak** gii-ombiigiziyin imaa gaa-initaagwak noopimiing.;
- ◆ Naanaagadawendan **ge-izhichigeyamban ji-manaa-maanzhichigesivan** gii-ombiigiziyin.nawach ji-gizhiwesinog gaa-bizindaman gi-daa-izhichige;
- ◆ Naanaagadawendan **aaniin giiyaabi** ge-izhiseg ishkwaagagwe-gwayakotooyin gii-ombiigiziyin.
- ◆ Godak **gegoonan gaa-ayaagin imaa gaa-ombiigiziimagakin ayaamaganoon**. Giin gi-doombiigiz, gegoonan dash bakaan ombiigiziimaganoon.

Gaa-ishkwaa-agindaman gaa-dazhinjigaadeg omaa, gigikendaamin aan enitaagwak gii-maamawi'idiying noopimiing gemaa bakaan inakamigak imaa noopimiing gaawiin giinawind eta.

Daabishkoo gaa-naagwak omaa, ozhibii'igaade ewe gii-maamawiseg iwe ombiigiziwin..

ES 11. Gi-gii-bizindaamin

Marten Falls Anishinaabeg ogaganoonaawaa godak anishinaabe' gaa-ayaanid bakaan ishkoniganing, gaye awiyag gaa-wii-bizindamowaad gaye ogimaawinan apii 2019 gii-izhiseg. Gii-inaawag iwe ji-doodamowaad iwe Enishkaagemagak / Inishkaagewin Ikidowin, Marten Falls Anishinaabeg gii-inaawag ji-gaganoonaawaad awiya bakaan, daabishkoo gaa-okwiinowaad Anishinaabeg gaye godak gaa-okwiinowaad gaye imaa/akiikaaning gaa-anokiowaad.

Gii-maajiseg iwe Enishkaagemagak / Inishkaagewin Ikidowin, niibiwa onizhishin gaa-izhiseg. Gakina igi gaa-dazhimindwaa omaa gii-gaganoonindiawag ji-dazhindamowaad gakina owe gaa-waawiinjigaadeg omaa mazina'iganing ji-gikendamowaad aan ezhi-gikendaagwak noongom gaa-izhiseg, gaye ezhi-andawenjigaadeg aandi Ge-inamog iwe Miikana gaye e-gii-ozhichigaadeg iwe Anishinaabe inaakonigewin ji-wiindeg aaniindi Ge-inamok iwe Miikana August 2024 gii-izhiseg.

Ji-gaganoonidiwaad gakina ogowe gaa-dazhimindwaa maawach gichi-inenjigaade. Aazha gashkichigaade ji-gaganoonidiwaad awiyag, ji-dagwiiwaad gaye ji-nana'itoowaad gegoon gii-inendamowaad. Amii ge-izhichigewaad Marten Falls Anishinaabeg gaye Anishinaabeg godak ishkoniganing gaa-onjiiwaad (daabishkoo Aabamadong gaye Aroland Anishinaabeg) ji-dazhindamowaad gaagiigidowin, aaniin ge-izhi-dazhindamowaad owe izhichigewin gaye aaniin ezhiseg iwe Dazhiikewin Miikana.

Marten Faals Anishinaabeg gaye izhisewag ji-dagwiiwaad imaa Gaagiigidowin gaye Dagwiiwin Izhichigewin aaniish naa anishinaabewiwag, gaye ji-waabandamowaad mazina'iganan gaye ji-maamawibiwaad nawach wiiba apiich godak dazhiikewinan, ogimaawinan gaye awiyag. Marten Falls Anishinaabeg gii-wiindamawaawag aaniin gaa-izhisenig gii-dazhindamowaad iwe Dazhiikewin Miikana ji-ikidowaad enendamowaad. Mazina'iganan gaa-waabanda'indwaa gii-ozhibii'igaade ji-achigaadeg gaa-gii-ikidowaad mawadoobiwining, gakinawenen ji-gikendang aaniin gaa-ikidowaad igi Anishinaabeg. Gii-onizhishin owe gii-izhichigeng wiiba ji-gikendamowaad wenizhishing gaye enenjigaadeg iwe Dazhiikewin Miikana gaye Enishkaaagemagak / Inishkaagewin Ikidowin, Anishinaabe Gikendaasowin Izhichigewin gaye ge-inamok miikana.

Mii ono aaninda gaa-gii-gaagiigidong gii-maamawibiwad awiyag, aaninda (gaawin wiin eta onowe).

- ◆ Nisinoon ge-izhi-wiindamaagenaaniwang (gii-maajiseg iwe Enishkaaagemagak Gikenjigewin October 2021 gii-izhiseg);
- ◆ Nisinoon ge-izhi-dazhinjigaadegiban owe akiikaan gaa-ziidoshkang, niizhin Anishinaabe gaye / Nakobii'igan Miinigoowiziwin Dazhinjigewinan gaye Nisin-Miikana Izhichigewin Maawaji'idiwin gaye Waabanda'iwewin, ogo gaa-gii-doodamowaad Dazhiikewin Miikana, Webikwe Miikana gaye Giwedinong Miikana gaye Anishinaabe dazhiikewinan. Miinawaa dash Nisin-Miikana Izhichigewin Maawaji'idiwin da-ayaamagan February 2025 izhiseg ji-dazhinjigaadeg Nitam Enishkagemagak / Inishkaagewin Ikidowin.
- ◆ Daataanginiganing oda-izhi-waabandaanaawaa Anishinaabeg gaawin memwaach ji-izhaasigwaa maawaji'iding, ogimaag gaye godak awiyag.
- ◆ Ozhichigaade gaye da-dagwiiwag Anishinaabe Gikendaasowin Izhichigewining gaye Gaa-niigaanishkang Dazhiikewining Izhichigewin imaa ishkoniiganing.
- ◆ Da-maajiinizha'igaadewan Wiindamaage Mazina'iganan ji-waabandamowaad Anishinaabeg aanin eni-izhiseg.
- ◆ Da-wabanda'iwenaniwan gaa-mazinaateseg ji-wiindamaageng gaa-gii-dazhinjigaadegin omaa mazina'iganing, gaa-gichi-inenjigaadeg, ezhiseg gegoon, gaa-aanji-izhiwebak, ge-inamog miikana ji-odaapinigaadeg gaye eni-dibaajimong iwe, gaye
- ◆ Da-maajiinizha'igaadewan E-Blasts gaa-izhinikaadegin (dibaajimoo-mazina'iganensan), ozhibii'iganan noopiming onji, gaye dazhinjigewinan, gaye andawenjigaadeg ji-wiindamaageyeg enendameg endaso-giizis gaa-anishinaabewiwaad dazhiikewining.

Da-dazhinjigenaaniwan apii dagwaagig / biboong 2025 izhiseg ji-dazhinjigaadeg Ishkwaawaach Enishkaagemagak / Inishkaagewin Ikidowin. Ono izhichigewinan da-wiiji'iwemaganoon ji-waabanjigaadeg miinawaa iwe Nitam Enishkaagemagak / Inishkaagewin Ikidowin gaye ji-miigiweng gaye ji-waabanjigaadeg iwe Ishkwaawaach Enishkaagemagak / Inishkaagewin Ikidowin.

ES 12. Gaa-ani-aanjiseg Gaa-izhiwebak Agwajiing

Gii-aanjiseg gaa-izhiwebak zanagisemagan gegoon daabishkoo ishkoninganing Marten Falls. Daabishkoo ono nawach gii-gichi-gimiwang, gii-mooshka'ang, gii-zakideg, gii-gichi-gizhideg gaye gaa-aanjiseg gakina gegoon omaa, maagizhaa da-onji-maanzhise ozhichigaadeg iwe Dazhiikewin Miikana gaye ji-naagajichigaadeg. Giinawind ge-apenimoying iwe miikana.

Iwe Dazhiikewin Miikana gaa-anokaadamowaad izhichigewag ji-manaa-onjiseg gegoon gaa-onizhishinzinog ozhichigaadeg iwe miikana gaye naagajichigaadeg. Da-izhichigaade ji-manaa-maanzhiseg giishpin gichi-izhiwebak agwajiing. Wii-ozhitoonaawaa miikana ge-zoongak gaye ji-minosewaad awiyag aanawi aanji-izhiwebak. Da-minose iwe Dazhiikewin Miikana gaawiin dash giyaabi daa-gibitinigaadesinon gaa-zanagak..

ES 13. Godak Ge-izhichigenaaniwangiban

Mii ezhi-andawendang Gaanada Aki ogimaa ji-naagadawaabandamowaad wegonen ge-maanzhisegiban imaa Dazhiikewin Miikanaang. Ge-izhichigaadeg iwe miikana. Gaye enaagadawenjigaadeg aaniin gaa-gii-izhisegin godag izhichiganan gii-gikenjigaade aaniin ge-izhi-maanzhisegiban daabishkoo giishpin ziigiseg waasigani-bimide, bichishinowin, gaye ozaami-gichi-maanzhi-izhiwebak, gaye godag.

Gaawiin awiya daa-bichishinzii giishpin weweni niigaan inaabing ge-izhiseg gegoon, gaye izhichigaadeg iwe miikana. Gaye daa-ozhiitaawag imaa gaa-anokiiwaad ji-izhitoowaad odanokiiwiniwaa gegoon ji-izhi-bichishinzig awiya anokiid, gaye ji-gikendamowaad ge-izhichigewaad giishpin awiya bichishing. Da-izhichigewag awenen ge-inanokii'ind ji-dazhiikang iwe miikana, ji-gikendang aaniin ge-doodang giishpin gegoon izhiseg. Daabishkoo, godag inake ji-izhitoowaad iwe ozhichigan, aandi gaye ge-izhi-webinigewaad, gaye aaniin ge-izhichigewaad gichi-gegoon izhiseg gaye aaniin ge-izhi-naagaji'indwaa aya'aawishag.

Iwe Dazhiikewin Miikana da-izhichigaade gaa-izhi-andawendang Ontario Ogimaa Miikanawan Gaa-Naagajitood. Gaye dash, mazinibii'igan gaa-biminizha'igaadeg ji-

ozhichigaadeg iwe Dazhiikewin Miikana mii iwe gaa-doodamowaad Bimi-ayaawin Gaanada Akiing gaye Ogimaa Gaa-naagajitood Bimishkaawin Ontario omaa nake.

Giishpin ayaasinog ge-biminizha'igaadeg ji-wiiji'indwaa Anishinaabe dazhiikewinan gaye wemitigoozhiwag gaa-anokiiwaad gii-wiijiwidiwaad, maagizhaa daa-bichishin awiya gaye gaawiin Anishinaabewaadiziwin iwe. Megwaa ozhichigaadeg miikana, awe gaa-dazhiikang oda-wiiji'igoo' Marten Falls Anishinaabe' amii dash ge-izhi-gikino'amaagewaad Anishinaabe-izhichigewin weweni ji-wiidanokiindiwaad. Owe izhichigenaaniwang ji-gikendamowaad wemitigoozhiwag aaniin ezhitwawaad Anishinaabeg, mii iwe ge-onizhishing biijigaadeg iwe miikana weweni ji-izhi-bimaadiziwaad Anishinaabeg.

Gaanada Aki gaa-doodang iwe Inishkaagewin Wiindamaagewinan andawendamooq ji-wiindamawindwaa aaniin ge-izhi-wiiji'iwemagak iwe Dazhiikewin Miikana ji-wiinichigaadesinog aki gaye ji-minodoodamowaad. Megwaa odaapinamowaad aandi ge-bimi-inamog miikana iwe Izhichigewin Gaa-dazhiikamowaad gii-ikidowag inishkaagewin ji-ganawaabanjigaadeg apii maawadoonamowaad gikendaasowin igi gaa-nagajitoowaad ji-waabandamowaad aaniin nibi, aki gaye awiyag ge-inishkaagemagak iwe ozhichigewin. Owe gikendaasowin da-ikidoomagan Gaa-andawenjigaadeg Aandi Ge-inamog ji-ikidowaad ini nisin izhichigewinan maawach gebekang izhichigewin apiich godak izhichigewinan. Inishkaagewin mawach da-bizinjigaade, apii onwaadamowaad aandi Ge-inamog miikana gaye ji-ozhitoowaad wegonen ge-minosemagak.

ES 14. Gaa-naagajichigemagakin Izhichigewinan gaye Niigaan

Naagadawaabanjigaadegin izhichigewinan da-onizhishin ji-gikenjigaadeg giishpin debwe e-izhiseg gegoon gaa-izhi-gikendamowaad gaye giishpin ji-manamaanzhidoodamowaad. Naagadawaabanjigaadegin ono gaye niigaan da-izhichigaaniwan ji-manamaanzhichigeng. Da-ozhichigaade ji-naagajichigaadeg owe izhichigewin gaye da-wiiji'aawag igi gaa-gichi-inenjigaadeg gaa-gii-wiindegin imaa Enishkaagemagak / Inishkaagewin Ikidowining.

Iwe Enishkaagemagak / Inishkaagewin Ikidowin izhichigemagan oganawaabandaanaawaa ge-doodamowaad jibwaa-ozhichigewaad gaye ozhichigewaad, gaye aabadak miikana gaye ganawenjigaadeg gaye niigaan ge-doodamowaad igi gaa-nagajitoowaad gegoon.

ES 15. Gaa-dakoosing Ikidowin gaye Ge-izhichigenaaniwangiban

Gaa-inishkaagemagakiban gaa-ozhichigadeg Ontario Ogimaa Bimi-ayaawin Gaa-naagajitood ogii-ozhibii'aanaawqa Bimishkaawin Enishkaagemagak Wiindamaagewin. Bimishkaagewin Enishkaagemagak Wiindamaagewin ayaawan mazinibii'iganan gaa-naagwak enishkaagemagak (daabishkoo ge-izhisemagakiban gaye aaniin ge-izhi-wiiji'iweng) ge-aabadak imaa wiindamaagewining gaye mazinibii'iganing ge-wiindamaagemagak.

Bimishkaagewin Enishkaagemagak Wiindamaagewin gii-aabajichigaade ji-ozhichigaadeg iwe gaa-dakoobii'igaadeg dibaajimowin gaye mazinibii'iganing gaa-ayaagin imaa 10 Inake. Endaso-maazina'iganing Gaa-gikendaasoomagak. Ji-waabanjigaadegin ini gaa-gii-mikigaadeg in Mazina'iganing Gaa-gikendaasoomagak, omaa bezhig mazina'iganing gii-achigaadewan gaye agobii'igaadewan imaa Enishkaagemagak / Inishkaagewin Ikidowining.